

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

ঢাকা, বুধবার ২৯ সেপ্টেম্বর ২০১৬, ১৪ আশ্বিন ১৪২৩

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। প্রধানমন্ত্রী শেখ হাসিনার জন্মদিনে মিলাদ, বিশেষ প্রার্থনা ও দীর্ঘায়ু কামনা
- ২। অস্তিম শয্যায় সব্যসাচী লেখক সৈয়দ শামসুল হক
শহিদ মিনারে কবিকে রাষ্ট্রপতির শ্রদ্ধা
- ৩। প্রধানমন্ত্রী শেখ হাসিনার জন্মদিনে ভারতের প্রধানমন্ত্রী নরেন্দ্র মোদির শুভেচ্ছা
- ৪। তথ্য অধিকার আইন যথাযথ বাস্তবায়নের আহ্বান রাষ্ট্রপতির
- ৫। এ বছর মেডিক্যালে ভর্তি পরীক্ষা ৭ অক্টোবর
প্রশ্ন ফাঁস হওয়ার সুযোগ নেই : স্বাস্থ্যমন্ত্রী
- ৬। সরকারি ক্রয় সংক্রান্ত মন্ত্রিসভা কমিটিতে ২ প্রস্তাব অনুমোদন
- ৭। সক্ষমতা সূচকে একধাপ এগিয়েছে বাংলাদেশ : বিশ্ব অর্থনৈতিক ফোরামের প্রতিবেদন
- ৮। সন্ত্রাসে অর্থায়ন রোধে উন্নত দেশের কাতারে বাংলাদেশ
- ৯। বাংলাদেশের রেলের উন্নয়নে ২০ কোটি ডলার দেবে এডিবি
- ১০। আসন্ন দুর্গাপূজায় ব্যাগ নিয়ে প্রবেশ, পটকা ও আতশবাজি নিষিদ্ধ : ডিএমপি কমিশনার
- ১১। ১৯তম সার্ক সম্মেলন স্থগিত
- ১২। বাংলাদেশি নারীদের সরাসরি ভিসা দেবে ভারত
- ১৩। আজ বিশ্ব হার্ট দিবস

চলমান পাতা

১। প্রধানমন্ত্রী শেখ হাসিনার জন্মদিনে মিলাদ, বিশেষ প্রার্থনা ও দীর্ঘায়ু কামনা

প্রধানমন্ত্রী শেখ হাসিনা দেশে না থাকলেও তার জন্মদিন পালনে কোনো কমতি ছিল না। তবে সব্যসাচী লেখক সৈয়দ শামসুল হকের মৃত্যুর কারণে প্রধানমন্ত্রীর নির্দেশনা অনুযায়ী তার ৭০তম জন্মদিন উপলক্ষে আওয়ামী লীগ ও এর সহযোগী-ভ্রাতৃপ্রতীম সংগঠনসমূহের গৃহীত কর্মসূচি স্থগিত করা হয়। এ কারণে কেবল কাটা, আলোচনা সভা, শোভাযাত্রার কর্মসূচি হয়নি। তবে দরিদ্রদের মাঝে খাবার বিতরণ, বঙ্গবন্ধু কন্যা প্রধানমন্ত্রী শেখ হাসিনার সুস্বাস্থ্য ও দীর্ঘায়ু কামনায় দোয়া, মিলাদ মাহফিল ও বিশেষ প্রার্থনা সভার মাধ্যমে প্রধানমন্ত্রীর জন্মদিন উদযাপিত হয়। দিবসটি উপলক্ষে বায়তুল মোকাররম জাতীয় মসজিদসহ দেশের বিভিন্ন মসজিদ, মন্দির ও প্যাগোডাসহ বিভিন্ন উপাসনালয়ে বিশেষ দোয়া ও প্রার্থনা সভার আয়োজন করা হয়। সূত্র-ইত্তেফাক (পৃ.১,ক.৮), যুগান্তর (শেষ পৃ.,ক.১), বাংলাদেশ টুডে (শেষ পৃ.,ক.৬), অবজারভার (শেষ পৃ.,ক.১)।

২। অস্তিম শয্যায় সব্যসাচী লেখক সৈয়দ শামসুল হক

শহিদ মিনারে কবিকে রাষ্ট্রপতির শ্রদ্ধা

সব্যসাচী লেখক সৈয়দ শামসুল হকের মরদেহে শ্রদ্ধা জানিয়েছেন রাষ্ট্রপতি মো. আবদুল হামিদ। দেশের সর্বস্তরের মানুষের শ্রদ্ধা নিবেদনের জন্য কেন্দ্রীয় শহিদ মিনারে গতকাল ২৮ সেপ্টেম্বর বুধবার নেওয়া হলে সেখানে তিনি সকাল ১১টা ২৫ মিনিটে কবির কফিনে পুষ্পস্তবক অর্পণ করে শ্রদ্ধা নিবেদন করেন। এ সময় রাষ্ট্রপতির সঙ্গে সৈয়দ হকের প্রতি শ্রদ্ধা নিবেদন করেন সংস্কৃতিমন্ত্রী আসাদুজ্জামান নূর। শ্রদ্ধা নিবেদন শেষে রাষ্ট্রপতি মো. আবদুল হামিদ কবির পরিবারের প্রতি গভীর সমবেদনা জানান। কেন্দ্রীয় শহিদ মিনারে সৈয়দ শামসুল হকের শ্রদ্ধানুষ্ঠানের আয়োজন করে সম্মিলিত সাংস্কৃতিক জোট। ঢাকা বিশ্ববিদ্যালয়ের কেন্দ্রীয় জামে মসজিদে বাদ জোহর তার নামাজের জানাযা অনুষ্ঠিত হয়। পরে তাকে তার গ্রামের বাড়ি কুড়িগ্রামে দাফন করা হয়। সূত্র-সংবাদ (পৃ.১,ক.১), ইত্তেফাক (পৃ.১,ক.২), বাংলাদেশ টুডে (শেষ পৃ.,ক.২), অবজারভার (পৃ.১,ক.৫), সংবাদ, সমকাল এ বিষয়ে লিড নিউজ ছেপেছে।

৩। প্রধানমন্ত্রী শেখ হাসিনার জন্মদিনে ভারতের প্রধানমন্ত্রী নরেন্দ্র মোদির শুভেচ্ছা

ভারতের প্রধানমন্ত্রী নরেন্দ্র মোদি প্রধানমন্ত্রী শেখ হাসিনার নেতৃত্বের উচ্ছ্বাসিত প্রশংসা করে বলেছেন, 'আপনার দক্ষ নেতৃত্বে উন্নয়ন থেকে নিরাপত্তা- সব ক্ষেত্রেই বাংলাদেশ শান্তি ও সমৃদ্ধির পথে দ্রুত এগিয়ে যাচ্ছে। প্রধানমন্ত্রী শেখ হাসিনার ৭০তম জন্মদিন উপলক্ষে তাকে শুভেচ্ছা জানিয়ে পাঠানো এক শুভেচ্ছা বার্তায় নরেন্দ্র মোদি আরও বলেন, 'আমি আমার অন্তস্তল থেকে আপনার জন্মদিনে আপনাকে (শেখ হাসিনা) অভিনন্দন জানাচ্ছি এবং আপনার মঙ্গল কামনা করছি।' ভারতের প্রধানমন্ত্রী বলেন, আগামী মাসে গোয়ায় ব্রিকস সম্মেলনে প্রধানমন্ত্রী শেখ হাসিনাকে স্বাগত জানানোর এবং আঞ্চলিক সহযোগিতা জোরদারের জন্য ঢাকা-দিল্লীর আলোচ্যসূচীর ব্যাপারে আলোচনার অপেক্ষায় তিনি রয়েছেন। আঞ্চলিক সহযোগিতার ক্ষেত্রে ভারত-বাংলাদেশ যৌথ উদ্যোগ এগিয়ে নিতে শেখ হাসিনা ভূমিকা রাখবেন বলেও তিনি আশাবাদ ব্যক্ত করেন। গতকাল ২৮ সেপ্টেম্বর বুধবার প্রধানমন্ত্রী শেখ হাসিনার ৭০তম জন্মদিনে ঢাকায় নিযুক্ত ভারতীয় দূতাবাস নরেন্দ্র মোদির শুভেচ্ছাবার্তা প্রকাশ করে। সূত্র-জনকণ্ঠ (পৃ.১,ক.২), ইনকিলাব (পৃ.১,ক.৮), নিউজ টুডে (পৃ.১,ক.৪), বাংলাদেশ টুডে (পৃ.১,ক.৩)।

৪। তথ্য অধিকার আইন যথাযথ বাস্তবায়নের আহ্বান রাষ্ট্রপতির

তথ্য অধিকার আইন (আরটিআই) যথাযথভাবে বাস্তবায়নের মাধ্যমে জনগণের ক্ষমতায়নে সম্মিলিত প্রচেষ্টা নেওয়ার জন্য সরকারি কর্মকর্তা, গণমাধ্যমকর্মী, সুশীল সমাজের সদস্য, বুদ্ধিজীবীসহ সবার প্রতি আহ্বান জানিয়েছেন রাষ্ট্রপতির মো. আবদুল হামিদ। রাজধানীর ওসমানী স্মৃতি মিলনায়তনে গতকাল ২৮ সেপ্টেম্বর বুধবার এক অনুষ্ঠানে বক্তৃতায় রাষ্ট্রপতি এ আহ্বান জানান। আন্তর্জাতিক তথ্য অধিকার দিবস উপলক্ষে তথ্য কমিশন এ অনুষ্ঠানের আয়োজন করে। সূত্র-প্রথম আলো (পৃ.২,ক.৪), যুগান্তর (পৃ.৩,ক.১), নিউজ টুডে (পৃ.৩,ক.৫), বাংলাদেশ টুডে (শেষ পৃ.,ক.৬)।

৫। এ বছর মেডিক্যালেরে ভর্তি পরীক্ষা ৭ অক্টোবর
প্রশ্ন ফাঁস হওয়ার সুযোগ নেই : স্বাস্থ্যমন্ত্রী

এ বছর এমবিবিএসের ভর্তি পরীক্ষা আগামী ৭ অক্টোবর সকাল ১০টা থেকে ১১টা পর্যন্ত অনুষ্ঠিত হবে। এবার মোট পরীক্ষার্থী ৯০ হাজার ৪১৭ জন। মোট আসন ৯ হাজার ৪১৭। এবার মেডিক্যাল ভর্তি পরীক্ষা শতভাগ স্বচ্ছতার সঙ্গে সম্পন্ন করতে কঠোর ব্যবস্থাসহ সার্বিক পদক্ষেপ গ্রহণ করা হয়েছে। ভর্তি পরীক্ষার স্বচ্ছতা তদারকি করতে বিভিন্ন পেশাজীবীকে নিয়ে গঠন করা হয়েছে ‘ওভারসাইড কমিটি’। গতকাল ২৮ সেপ্টেম্বর বুধবার সচিবালয়ে স্বাস্থ্য ও পরিবার কল্যাণ মন্ত্রণালয়ের সভাকক্ষে ‘এমবিবিএস’ ভর্তি পরীক্ষা নিয়ে বাংলাদেশ হেলথ রিপোর্টার্স ফোরামের সঙ্গে মতবিনিময় সভায় প্রধান অতিথির বক্তব্যে স্বাস্থ্য ও পরিবার কল্যাণমন্ত্রী মোহাম্মদ নাসিম বলেন, এমবিবিএস ভর্তি পরীক্ষায় প্রশ্নপত্র ফাঁস হওয়ার কোনো সুযোগই নেই। শতভাগ স্বচ্ছতা নিশ্চিত করে মেডিক্যাল ভর্তি পরীক্ষা অনুষ্ঠিত হবে। তিনি বলেন, সব সময় জবাবদিহিতায় বিশ্বাস করি। গত বছর প্রশ্নপত্র ফাঁসের অভিযোগ উঠলেও তা পরবর্তীতে গুজব ও ভিত্তিহীন বলে প্রমাণিত হয়। এবারও স্বাস্থ্য মন্ত্রণালয়ের ভাবমূর্তি নষ্ট করতে এমন ষড়যন্ত্র হতে পারে। তাই এবার বাড়তি কিছু উদ্যোগ গ্রহণ করা হয়েছে।

সূত্র- ইত্তেফাক (পৃ.১,ক.৮), যুগান্তর (পৃ.৩,ক.৬), নিউজ টুডে (শেষ পৃ.,ক.১), বাংলাদেশ টুডে (শেষ পৃ.,ক.৬)।

৬। সরকারি ক্রয় সংক্রান্ত মন্ত্রিসভা কমিটিতে ২ প্রস্তাব অনুমোদন

সিরাজগঞ্জে ৬ তলা বিশিষ্ট একটি হাসপাতাল নির্মাণ প্রকল্পসহ দুইটি ক্রয় প্রস্তাব অনুমোদন দিয়েছে সরকারি ক্রয় সংক্রান্ত মন্ত্রিসভা কমিটি। এতে মোট ব্যয় হবে ১৮৬ কোটি ৮৭ লাখ টাকা। গতকাল ২৮ সেপ্টেম্বর বুধবার সচিবালয়ে মন্ত্রিপরিষদ বিভাগের সম্মেলন কক্ষে বাণিজ্যমন্ত্রী তোফায়েল আহমেদের সভাপতিত্বে অনুষ্ঠিত বৈঠকে এ ক্রয় প্রস্তাবগুলোর অনুমোদন দেওয়া হয়। সূত্র-সংবাদ (পৃ.২,ক.৭), জনকণ্ঠ (পৃ.১৯,ক.৮)।

৭। সক্ষমতা সূচকে একধাপ এগিয়েছে বাংলাদেশ : বিশ্ব অর্থনৈতিক ফোরামের প্রতিবেদন

বৈশ্বিক সক্ষমতা সূচকে একধাপ এগিয়েছে বাংলাদেশ। ২০১৫-১৬ অর্থবছরে ১০৭তম অবস্থান থেকে ১০৬তম অবস্থানে উঠে এসেছে বাংলাদেশ। বিশ্ব অর্থনৈতিক ফোরাম (ডব্লিউইএফ) গতকাল ২৮ সেপ্টেম্বর বুধবার সারা বিশ্বে একযোগে এই সূচক প্রকাশ করেছে। সক্ষমতা সূচকে এক ধাপ অগ্রগতি হলেও সব মিলিয়ে বাংলাদেশের স্কোর হয়েছে গত বছরের মতোই ৩ দশমিক ৮। বাংলাদেশে এই ফোরামের পক্ষে প্রতিবেদনটি আনুষ্ঠানিকভাবে প্রকাশ করে বেসরকারি গবেষণা সংস্থা সেন্টার ফর পলিসি ডায়ালগ (সিপিডি)। এ উপলক্ষে গতকাল ২৮ সেপ্টেম্বর বুধবার সিরডাপ মিলনায়তনে আয়োজিত এক সংবাদ সম্মেলনে প্রতিবেদনের বিস্তারিত তুলে ধরেন সিপিডির অতিরিক্ত গবেষণা পরিচালক খন্দকার গোলাম মোয়াজ্জেম। সূত্র-ইত্তেফাক (পৃ.১,ক.৫), সমকাল (পৃ.২,ক.৬), ইন্ডিপেনডেন্ট (পৃ.৯,ক.১), ডেইলি সান (পৃ.১,ক.৭)।

৮। সন্ত্রাসে অর্থায়ন রোধে উন্নত দেশের কাতারে বাংলাদেশ

মানিলভারিং ও সন্ত্রাসে অর্থায়ন প্রতিরোধ কার্যক্রমে আন্তর্জাতিক মানে উন্নীত হয়েছে বাংলাদেশ। এশিয়া প্যাসিফিক গ্রুপ অন মানিলভারিং (এপিজি)-এর চূড়ান্ত প্রতিবেদনে এ স্বীকৃতি দেওয়া হয়েছে। বাংলাদেশ এ সক্ষমতা অর্জন করায় দেশি-বিদেশি বিনিয়োগ বাড়বে বলে আশা প্রকাশ করেছে বাংলাদেশ ব্যাংক। গতকাল ২৮ সেপ্টেম্বর বুধবার এপিজির মূল্যায়ন প্রতিবেদন বিষয়ে এক সংবাদ সম্মেলন বাংলাদেশ ব্যাংকের পক্ষ থেকে এ আশা প্রকাশ করা হয়। সূত্র-সংবাদ (পৃ.১,ক.৬), ইত্তেফাক (পৃ.১৮,ক.৫), ইন্ডিপেনডেন্ট (পৃ.১,ক.৬), বাংলাদেশ টুডে (পৃ.১০,ক.৬)।

৯। বাংলাদেশের রেলের উন্নয়নে ২০ কোটি ডলার দেবে এডিবি

বাংলাদেশের রেলের উন্নয়নে ২০ কোটি মার্কিন ডলার ঋণ দিচ্ছে এশীয় উন্নয়ন ব্যাংক (এডিবি)। বাংলাদেশি মুদ্রায় যার পরিমাণ প্রায় ১৬০০ কোটি টাকা। এই সহায়তার মাধ্যমে রেলওয়ের যাত্রী ও পণ্য পরিবহণ ক্ষমতা বাড়ানো হবে। এ লক্ষ্যে বাংলাদেশ সরকার ও এডিবির মধ্যে চুক্তি স্বাক্ষর হয়েছে। এডিবির সহজ শর্তের ঋণ

(ওসিআর) ৫ বছর গ্রেস পিরিয়ডসহ ২৫ বছরে পরিশোধ করতে হবে। সূত্র-সংবাদ (শেষ পৃ.,ক.৫), ইন্ডেফাক (পৃ.১৮,ক.৭), ইন্ডিপেনডেন্ট (শেষ পৃ.,ক.৮), বাংলাদেশ টুডে (পৃ.১,ক.৬), নিউজ টুডে এ বিষয়ে লিড নিউজ ছেপেছে।

১০। আসন্ন দুর্গাপূজায় ব্যাগ নিয়ে প্রবেশ, পটকা ও আতশবাজি নিষিদ্ধ : ডিএমপি কমিশনার

শারদীয় দুর্গাপূজায় পটকা ফুটানো বা আতশবাজি পোড়ানো নিষিদ্ধ থাকবে বলে জানিয়েছেন ঢাকা মহানগর পুলিশ কমিশনার আসাদুজ্জামান মিয়া। সেই সঙ্গে রাজধানীর ২২৯টি পূজামণ্ডপে কোনো ব্যাগ নিয়ে প্রবেশ করা যাবে না বলেও জানান কমিশনার। গতকাল ২৮ সেপ্টেম্বর বুধবার ডিএমপি সদর দফতরে দুর্গাপূজা উপলক্ষে আইনশৃঙ্খলা সংক্রান্ত সভায় তিনি এ কথা বলেন। ডিএমপি কমিশনার গোয়েন্দা কর্মকর্তাদের উদ্দেশ্যে বলেন, পূজামণ্ডপ ও আশেপাশের এলাকায় গোয়েন্দা নজরদারি রাখতে হবে। এ সময় তিনি তাজিয়া মিছিল এবং দুর্গা প্রতিমা বিসর্জনের জন্য নির্ধারিত রাস্তার ট্রাফিক ব্যবস্থাপনা সাজাতেও নির্দেশ দেন। সূত্র-যুগান্তর (পৃ.১৫,ক.১), ইন্ডেফাক (পৃ.১৫,ক.৬)।

১১। ১৯তম সার্ক সম্মেলন স্থগিত

বাংলাদেশ, ভারত, ভুটান এবং আফগানিস্তান অংশগ্রহণ না করায় পাকিস্তানের ইসলামাবাদে আয়োজিত ১৯তম সার্ক সম্মেলন স্থগিত করা হয়েছে। আর অভ্যন্তরীণ বিষয়ে হস্তক্ষেপের কারণে ইসলামাবাদে অনুষ্ঠিত এ সম্মেলনে বাংলাদেশের না যাওয়ার কথা জানিয়েছেন পররাষ্ট্র প্রতিমন্ত্রী। ভারত আগেই সম্মেলনে না যাওয়ার কথা বলেছিল। বাকি দু'দেশও পাকিস্তানের সম্মেলনে যাবে না বলে জানিয়েছে। সার্কের রীতি অনুযায়ী, জোটভুক্ত একটি দেশও অংশ নিতে অপরাগ হলে সম্মেলন হতে পারে না। নেপালের প্রধান ইংরেজি দৈনিক কাঠমাণ্ডু পোস্ট'র এক প্রতিবেদনে বলা হয়, বাংলাদেশ, ভারত, আফগানিস্তান ও ভুটান এবারের সম্মেলনে অংশ না নেওয়ার কথা জানিয়ে দেওয়ার পর সম্মেলন স্থগিতের বিষয় অনিবার্য হয়ে ওঠে। তাই সার্ক শীর্ষ সম্মেলন স্থগিত করা হয়েছে। সূত্র-সংবাদ (পৃ.১,ক.৫), সমকাল (পৃ.১,ক.২), নিউজ টুডে (পৃ.১,ক.৫) জনকণ্ঠ, প্রথম আলো, ভোরের কাগজ, বাংলাদেশ টুডে, অবজারভার, ইন্ডিপেনডেন্ট, নিউ নেশন, ডেইলি সান, ডেইলি স্টার এ বিষয়ে লিড নিউজ ছেপেছে।।

১২। বাংলাদেশি নারীদের সরাসরি ভিসা দেবে ভারত

পাসপোর্টে বিমানের টিকিট সংযুক্ত থাকলে ই-টোকেন ছাড়াই নারী ভ্রমণকারীদের সরাসরি ভিসা দেবে ভারতীয় হাইকমিশন। একটি পরীক্ষামূলক প্রকল্পের আওতায় এ আবেদন নিবে হাইকমিশন। আগামী ৩ থেকে ১৬ অক্টোবর গুলশানের ভিসা অ্যাপ্লিকেশন সেন্টারে এ প্রকল্প চালু থাকবে বলে গতকাল ২৮ সেপ্টেম্বর বুধবার এক বিবৃতিতে জানানো হয়েছে। আসন্ন দুর্গাপূজার ছুটির সময় বাংলাদেশি নারী ও তার পরিবারের সদস্যদের জন্য এটি ভারতের পক্ষ থেকে শুভেচ্ছা উপহার বলে বিবৃতিতে জানানো হয়। এ সুবিধা পেতে নারী ভ্রমণকারীদের পাসপোর্টে অবশ্যই বিমানের টিকিট সংযুক্ত থাকতে হবে, যেটি ভিসা সেন্টারে ঢোকান সময় দেখাতে হবে। আবেদনপ্রার্থী নারী চাইলে তার সঙ্গে পরিবারের যেসব সদস্য ভারতে যাবেন তাদের ভিসা আবেদনও এ প্রক্রিয়ায় জমা দিতে পারবেন। নারী আবেদনকারীকে অবশ্যই অক্টোবর মাসে দেশটিতে ভ্রমণ করতে হবে। সূত্র-সংবাদ (শেষ পৃ.,ক.৪), জনকণ্ঠ (শেষ পৃ.,ক.৬), বাংলাদেশ টুডে (পৃ.১,ক.৩), ইন্ডিপেনডেন্ট (পৃ.৩,ক.১)।

১৩। আজ বিশ্ব হার্ট দিবস

হৃদরোগ, হৃদরোগের কারণ ও ঝুঁকিগুলো বিষয়ে জনসচেতনতা বৃদ্ধির লক্ষ্যে ওয়ার্ল্ড হার্ট ফেডারেশনের উদ্যোগে বিশ্বের অন্যান্য দেশের মতো বাংলাদেশেও আজ ২৯ সেপ্টেম্বর বৃহস্পতিবার বিশ্ব হার্ট দিবস উদযাপন করা হবে। ওয়ার্ল্ড হার্ট ফেডারেশনের ওয়েবসাইট থেকে জানা যায়, এ বছর দিবসটির প্রতিপাদ্য নির্ধারণ করা হয়েছে 'সুস্থ হার্ট, প্রাণবন্ত জীবন'। বিগত বিশ্ব স্বাস্থ্য সম্মেলনে অসংক্রামক রোগগুলোর ভেতর হৃদরোগকে অন্যতম ভয়াবহ হিসেবে শনাক্ত করে ২০২৫ সালের ভেতর এ রোগের নিয়ন্ত্রণ এবং মৃত্যুর হার ২৫ শতাংশ কমিয়ে আনার লক্ষ্যমাত্রা নির্ধারণ করা হয়। সূত্র-যুগান্তর (পৃ.৩,ক.৩), জনকণ্ঠ (পৃ.১,ক.১), সমকাল (পৃ.৩,ক.১)।

সম্পাদকীয়

- ক. **ইত্তেফাক :** দেশে অযোগ্য ও মানহীন বেসরকারি পলিটেকনিক ইনস্টিটিউটের ছড়াছড়ি এক প্রতিবেদনে তা প্রকাশিত হওয়ায় উদ্বেগ প্রকাশ করে প্রতিষ্ঠানগুলোর মান বাড়াতে নীতিমালার আলোকে অনুমোদন দেওয়ার ওপর গুরুত্বারোপ।
- খ. **প্রথম আলো :** বাংলাদেশ পেট্রোলিয়াম করপোরেশনের (বিপিসি) অধীন প্রতিষ্ঠান পদ্মা অয়েল কোম্পানি লিমিটেডের বিরুদ্ধে অপরিশোধিত জ্বালানি তেল বাজারজাত করার অভিযোগ উঠেছে উল্লেখ করে এ কর্মকাণ্ডের সাথে জড়িতদের চিহ্নিত করে বিচার দাবি।
- গ. **সংবাদ :** আসন্ন সার্ক শীর্ষ সম্মেলনে অন্য আরও কয়েকটি দেশের মতো বাংলাদেশেরও যোগ দেওয়ার সিদ্ধান্ত না নেওয়াকে সঠিক সিদ্ধান্ত বলে উল্লেখ করে সার্ককে এগিয়ে নিতে বিকল্প চিন্তার সুপারিশ।
- ঘ. **যুগান্তর :** গাজীপুর জেলার শিল্পাঞ্চলে গ্যাস সংকটের কারণে সেখানকার শিল্প প্রতিষ্ঠানে উৎপাদন মারাত্মক ব্যাহত হওয়ায় এ ব্যাপারে কার্যকর পদক্ষেপ নেওয়ার আহ্বান।
- ঙ. **ইন্ডিপেনডেন্ট, ডেইলি সান, অবজারভার, নিউ নেশন, নিউজ টুডে, সমকাল, জনকণ্ঠ, যুগান্তর, ভোরের কাগজ :** সব্যসাচী লেখক সৈয়দ শামসুর হকের মৃত্যুতে কবির পরিবার ও স্বজনদের প্রতি গভীর সমবেদনা জানিয়ে একজন কবি ও লেখক হিসেবে বাংলা ভাষা ও সাহিত্যে তিনি অবিদ্বন্দ্বিতা চিরস্বর্ণীয় হয়ে থাকবেন বলে অভিমত।
- চ. **ডেইলি স্টার, ইন্ডিপেনডেন্ট, ডেইলি সান, সংবাদ :** তথ্য অধিকার আইনকে আরও কার্যকর করতে এর সঙ্গে সাংঘর্ষিক নীতিগুলো অপসারণের পাশাপাশি এ ব্যাপারে সরকারের আরও আন্তরিকতা ও সদিচ্ছার প্রয়োজনীয়তার ওপর গুরুত্বারোপ।
- ছ. **নিউ নেশন :** দেশের যুব সম্প্রদায়কে মানবপাচারের হাত থেকে রক্ষা করতে র্যাবকে প্রয়োজনীয় ভিজিলাস বাড়ানোর পাশাপাশি সরকারকে নানাবিধ পদ সৃষ্টি করে যুবকদের যথাযথ কর্মসংস্থানের ব্যবস্থা করার সুপারিশ।
- জ. **নিউ এজ :** ব্যাংক লোনের সুদের হার দুই ডিজিটে নেওয়ায় বর্তমানে শিল্পখাতে ক্রমাগত খেলাপি ঋণের পরিমাণ বৃদ্ধি পাওয়ায় সরকারকে ব্যাংকিং ব্যবস্থাপনায় পরিবর্তন আনয়নের সুপারিশ।
- ঝ. **ফিন্যানশিয়াল এক্সপ্রেস :** পর্যটন খাতের অবকাঠামোগত উন্নয়নে বাংলাদেশ পর্যটন বোর্ডকে আরও সক্রিয়ভাবে কাজ করে বিদেশি পর্যটকদের আরও আকর্ষণের ব্যবস্থা করার আহ্বান জানিয়ে সম্পাদকীয় প্রকাশ করেছে।

উপ-সম্পাদকীয়

সংবাদ পত্রিকায় প্রকাশিত কলামে দক্ষিণ এশীয় অর্থনীতিতে বেসরকারি খাতই অধিকাংশ অর্থনৈতিক উন্নয়নের মুখ্য উৎস ও নিয়ন্তা বলে উল্লেখ করা হয়েছে।

নিবন্ধ ও ফিচার

প্রথম আলো পত্রিকায় প্রকাশিত ‘হৃদবান্ধব পরিবার ও সমাজ চাই’ শিরোনামের নিবন্ধে এ কে এম মহিবুল্লাহ সামাজিক আন্দোলন গড়ে তোলার মাধ্যমে হৃদরোগ প্রতিরোধে সবাইকে সচেতন ও সম্পৃক্ত করা এই মুহূর্তে প্রয়োজন বলে অভিমত প্রকাশ করেছেন।

#